



Vaksdal kommune

Kontrollutvalet

TIL VAKSDAL KOMMUNE V/ KOMMUNESTYRET.

ÅRSREKNESKAPEN 2019 FOR VAKSDAL KOMMUNE, UTTALE FRÅ KONTROLLUTVALET.

Kontrollutvalet har i møte 27.05.2020 handsama Vaksdal kommune sin årsrekneskap for 2019.

Representantar frå administrasjonen og ansvarleg revisor var til stades i møtet og presenterte årsrekneskapen og svarte på spørsmål.

Revisjonsmeldinga frå Deloitte

Kommunen sin revisor, Deloitte, har lagt fram revisjonsmelding datert 15.04.20. Her er medteke at driftsrekneskapen viser kr. 295 010 000 til fordeling drift og eit rekneskapsmessig mindreforbruk på kr. 5 765 491.

Det kjem ikkje fram spesielle forhold som blir omtala i revisjonsmeldinga og den vert å sjå på som «ei rein» revisjonsmelding.

Deloitte nemner følgjande under *andre forhold* på side 3 i revisjonsmeldinga:

Kommunen sine lån skal med bakgrunn i generasjonsprinsippet avdragast slik at attståande løpetid for den samla gjeldsbyrde ikkje overstig den veide levetida for kommunen sine anleggsmidlar ved siste årsskifte, jf. kommunelova § 50 nr. 7a. Kommunal- og Moderniseringsdepartementet legg til grunn at § 50 nr. 7a må forståast slik at kommunar er forplikta til årleg å betale avdrag tilsvarende minimumskravet. Vaksdal kommune har i 2019 ikkje betalt avdrag på lån.

Vurdering av rekneskapen

Av rekneskapen for 2019 har kontrollutvalet merka seg at netto driftsresultat er positivt med kr. 14 076 635, dvs. netto resultatgrad på 3,24 % (Sett opp mot sum driftsinntekter). Gjennomsnitt for alle kommunane i Noreg ligg ifølgje opplysningar frå SSB på netto resultatgrad på 1,9 % i 2019. Teknisk beregningsutvalg for kommunal og fylkeskommunal økonomi (TBU) tilrår at ein over tid bør ha netto resultatgrad på 1,75 prosent for å ha ei forsvarleg økonomisk drift.

Driftsresultatet i Vaksdal kommune for 2019 syner eit positivt og godt driftsresultat. Kommunen har ei lånegjeld i 2019 som er 90,1 % av sum driftsinntekter, som er godt over tilrådinga frå Riksrevisjonen. Tilsvarende tal var 58,0 % i 2018. Disposisjonsfondet er på 17,1 % av driftsinntektene. Det er gledeleg at storleiken på disposisjonsfondet er godt over tilrådinga frå Riksrevisjonen.

Kontrollutvalet merkar seg m.a. følgjande frå rådmannen sin uttale i årsmeldinga:

Vedtatte investeringar i budsjett 2020 og planlagde investeringar i økonomiplanperioden vil medføre stor auke i lånegjelda til kommunen også i åra framover. Det er venta at denne vil stige til over 100% innan få år dersom vedtekne investeringar vert gjennomførte. Dette vil gå på bekostning av det økonomiske handlingsrommet kommunen har hatt dei siste åra, og gjere kommunen mindre rusta til å tilpasse seg endringar i tenestene.

Kommunen fekk eit positivt økonomisk resultat med kroner 5 765 491 i overskot i 2019. Inntektsutjamning knytt til skatt og rammetilskot mot slutten av regnskapsåret gav oss ekstra inntekter. Saman med ei positiv avkastning på aksjar og obligasjonar, litt høgare inntekter frå eigedomsskatt og konsesjonskraft, bidrog dette til overskotet. Dei seinare åra har kommunen gradvis effektivisert og tilpassa drifta til endra rammevilkår. Kommunen har klart å finansiere ein del investeringar med løpande inntekter i staden for låneopptak. Drifta er framleis ikkje i balanse i forhold til løpande inntekter og det vil vera nødvendig å tilpasse driftsnivået til inntektsgrunnlaget framover. Nedgang i folketalet reduserer inntektene og presset på økonomien vil auke. Saman med høge investeringar vil dette svekke handlingsrommet og krevje omstillingar.

Kontrollutvalet har merka seg at forhold som gjeld internkontroll, etikk, likestilling og diskriminering er omtalt i årsmeldinga for 2019.

I revisjonsrapport nr. 7 har revisor kome med tilrådingar innanfor ein del rekneskapsområdet. Kontrollutvalet er ikkje tilfreds med at fleire tilhøve er «gjengangarar» i revisjonsrapportane for dei siste åra, utan at det i tilstrekkeleg grad er ordna opp ennå. I attestasjonsuttalen om etterlevingskontroll nemner revisor manglande innkreving av kommunale avgifter sett opp mot regelverket om offentlig støtte.

Kontrollutvalet vil be rådmannen om å komme inn i første møte til hausten for å gjera greie for kva som er/vil bli gjort i høve tilrådingane i revisjonsrapporten og forhold som er omtalt i attestasjonsuttalen.

Kontrollutvalet har som oppgåve å gje uttale til kommunen sin årsrekneskap. Uttalen vert gjeve med bakgrunn i framlagd årsrekneskap, og årsmelding frå administrasjonen, samt revisjonsmelding, revisjonsrapport og attestasjonsuttale om etterleving frå revisor mv. Kontrollutvalet tek sjølv stilling til kva tilhøve som skal omtalast i uttalen. Det vil vera naturleg å ta med spesielle tilhøve som vert omtala i revisjonsmeldinga og eventuelle revisjonsrapportar og nummererte brev. Dessutan samanheng mellom netto driftsresultat, langsiktig gjeld og disposisjonsfond. Uttalen skal sendast til kommunestyret, med kopi til formannskapet.

Oppsummering og tilrådingar frå kontrollutvalet:

- Kontrollutvalet merkar seg at driftsresultatet i Vaksdal kommune for 2019 er tilfredsstillande.
- Kontrollutvalet har vidare merka seg at lånegjelda er godt over tilrådd nivå.
- Kontrollutvalet merkar seg at Vaksdal kommune har eit disposisjonsfond som er monaleg betre enn minimumstilrådinga frå Riksrevisjonen.
- På bakgrunn av det som kjem fram i revisjonsrapport nr. 7, datert 15.04.2020 frå Deloitte, derav noko som er påpeika over fleire år, ber kontrollutvalet om at rådmannen kjem i første møte til hausten for å gjera greie for kva som er/vil verta gjort i høve tilrådingane i rapporten.
- På bakgrunn av det som kjem fram i attestasjonsuttalen om etterlevingskontroll datert 15.04.20 frå Deoitte ber kontrollutvalet om at rådmannen kjem i første møte til hausten for å gjera greie for kva som er/vil verta gjort i høve tilrådingane i uttalen.

Ut over det som er nemnd over, og det som går fram av saksframlegget til kontrollutvalet i rekneskapssaka, samt revisjonsmeldinga av 15.04.20, revisjonsrapport nr.7, datert 15.04.20 og attestasjonsutale om etterlevingskonroll datert 15.04.20, har kontrollutvalet ikkje merknader til Vaksdal kommune sin årsrekneskap for 2019.

Kontrollutvalet i Vaksdal kommune 27. mai 2020.

Vegard Sellevold
-kontrollutvalsleiar-

Dokumentet er elektronisk godkjent og har derfor ikke underskrift.

Kopi: Vaksdal kommune, formannskapet